

THE CARMELIAN

The Official Publication of Mt. Carmel Parish
Balilihan, Bohol

website: mtcarmelparish.tripod.com
e-mail address: mtcarmel_parish@yahoo.com



VOL. VI-11 IKAKAWHAAG-WALO NGA DOMINGO SULOD SA TUIG (B) OCTOBER 15, 2006



TEMA: UNSA MAY IMONG GIKINAHANGLAN

Karon ang pulong sa Dios naghagit kanato: asa man nimo ipahimutang ang imong kasinekasine? Hain man ang imong kapaniguroan? Unsa may nakapahimo sa imong kinabuhi nga bililhon ug bulawanan? Ania ang sugyot sa pulong ug sa kaalam sa Dios sukad pa sa Daang Tugon ug ania kining pasidaan ni Jesus: Ayaw ipahimutang ang imong kasinekasine diha sa mga kabtangan kay kini sila mahimong imong mga agalon. Himoa ang Dios nga imong Ginoo. Himoa nga si Jesus mao ang imong sundon.

MGA PASIUNA UG MGA PAGBASA

UNANG PAGBASA

Manggiyalamon uban sa kaalam sa Dios. Mas mahinungdanon pa kay sa gahum, kabtangan, kaayohan sa lawas, ug kaanyag mao ang kaalam nga naggikan sa Dios. Makapahimo kini kanatong buhi diha sa gugma sa Dios.



KINUTLO GIKAN SA BASAHON SA KAALAM NI SOLOMON

Wis. 7: 7-11

Sa pagkamatngon ko nga ako usa lamang ka tawo, nag-ampo ako ug gihatag kanako ang pagpanabot. Miabot kanako ang espiritu sa Kaalam. Gimahal ko siya labaw kay sa bisan unsang trono o korona. Walay bali ang bahandi kon itandi kaniya. Ang mahalona nga mga alahas dili makatupong sa iyang bili; kon itupad sa Kaalam ang tanang bulawan sa kalibutan daw usa lamang ka pudyot nga balas, ug ang plata dili mobili labaw sa lapok. Gimahal ko siya labaw sa maayong panglawas ug sa maayong panagway. Iyaha sa Kaalam ang usa ka kasanag nga dili gayod moawop, ug gipalabi ko kini labaw sa bisan unsang kahayag.

Sa pagkunsad sa Kaalam nganhi kanako, miabot uban kaniya ang tanang maayong mga butang. Gidad-an ako niya sa dili ikaasoy nga mga bahandi.

PULONG SA GINOO.
SALAMAT SA DIOS.

SALMO RESPONSORYO

Ps. 90: 12-13, 14-15, 16-17

R. Pun-a kami sa imong gugma, O Ginoo, ug mag-awit kami tungod sa kalipay!

Tudloi kami sa matarong nga pangisip sa among mga adlaw, aron makakab-ot kami og kaalam sa kasingkasing. Balik na, O Ginoo, kanus-a pa? Kaloy-i ang imong mga sulugoon.

R. Pun-a kami sa imong gugma,....

Pagkabuntag pun-a kami sa imong kaluoy, aron mosinggit kami tungod sa kalipay ug kasadya sa tanan namong mga adlaw. Himoa nga malipay kami, tungod sa mga adlaw nga imo kaming gisakit, tungod sa mga tuig kanus-a nakita namo ang dautan.

R. Pun-a kami sa imong gugma,....

Hikit-an unta sa imong mga sulugoon ang imong buhat ug ang imong himaya hikit-an sa ilang mga anak; Maato unta ang mahigugmaong pag-amoma sa Ginoo nga atong Dios; Palampuson niya alang kanato ang buhat sa atong mga kamut. (Palampuson niya ang buhat sa atong mga kamut!)

R. Pun-a kami sa imong gugma, O Ginoo, ug mag-awit kami tungod sa kalipay!

IKADUHANG PAGBASA

Ang Pulong sa Dios Buhi ug May Maayong Linugdangan. Ang Pulong sa Ginoo makapukaw. Mopugos kini kanato sa pag-atubang sa atong kaugalingon, alang o batok sa Dios. Mahinungdanon kini alang sa linugdangan sa atong mga kinabuhi.

